

AHEPERI,

EKAPIITULU YA NENLI ¹

☛ . . . ? . . . kaari muumu musaala ni yaahikisivela e . . . [Nipuro vahiihthu mufiitani—Mol.] Nto vano Eliivuru yoopacerya y'aHeperi, ti Paulo, hiyo ninniphwanya, ahiiso ninnaamini. Mateyooloku ari woomalelani; awo khansuwela exeeni, ahiiso t'ani olempe Eyo. Masi, miyo kinnaamini, wira mutthu ti mutthu orina othokorerya wa erooho aamoona wira ti Paulo. Enna—ennaaminiwa, ni anamalepa anci-ene, wira ti Paulo. Ni moota owo . . .

² Mukapiituluni 1, naahiphwanya wira yaamunnuwiha Pwiya Yesu. Oh, moota owo oruuhaly'awe, wira ooniherye ni mu—ni musuwelelo owo aakhalanny'awe arowaka oTamasiku. Vano, Paulo aari, opacerya wene, muteyooloku eekeekhai. Paulo aaxuttihiwe ni Kamaliyeli, mmosa w'axuttihi oolokaxa a mahiku ale. Ni owo aari musomi ni aankhili, ni aari ookhomaala ni nammusoma eekeekhai a Bibilia.

³ Ni koophwanya ela, okathi wiir'awe arowaka oTamasiku, ni iwarakha mpoolosani mw'awe, wira aatthukwe othene ale yaatthara ephiro ya Ehapari yooreera yoottottopeliwa, ni mulopwan'owo aari a exariya. Masi, kweekwe kinnaamini wira okhuma okathi Paulo aamoonaly'awe Sitefano okhwa, kinoona wira eyo yaahimwiiniha murima. Okathi weemerenry'awe okhwa wa Sitefano, ni khuvarela soowara s'ale yaamuvonyakasa ni maluku, vano Paulo aahittheka mwaha w'ephome ya Sitefano. Ni owo aahihimya, khwira, “Miyo hata nkiniphwanela,” khwira, “okhala wira kooyeehi ephome ya Awawe—Awawe, namoona, Sitefano.” Okhala wira aari vaavo.

⁴ Nto nyuwo mwakhalaru namoona a etthu p'itthu, nyuwo munkhala oottheke ntoko wira muhiira mpantta wa yeeyo. Tivo hiyo nakhala namoona, wira, “Oh, ayo, khivaatthuneya wira ela, *elexe ni lexe*,” mukhale ookasopa etthu munihimy'anyu, okhala wira nyuwo moottheke mwa enamuna omphuk'anyu. Mwaahiweryeke othanla, muhihimye etthu, muhiye paahi. Vano mwaahimiyaka wira mwa muKristu, vano moottheke. Munnona? Moottheke mwaha wo okhala muKristu, ni muhaana okhalana makhalelo yaawo. Nto Muluku aamulapaka na—Natiri mBibiliani. . . Kinnimoona mulopwana mmosa va vakhaterani va iroota. Muluku aamulapaka Natiri, Owo t'ottheke wa Natiri yoowo voohikhala wira Owo onommaliherya. Muluku t'ottheke Owo aammanaka Natiri. Ni Soolempwa ti soottheke mpakha Iyo omaliheriwa. Munnona?

Iyo si—Iyo sinkhala vaavo ntoko nu—nuulumo Muluku ohimaly'awe. Ni Eyo ehaana omaliheriwa ahiiso Muluku t'ottheka. Munnona?

⁵ Nto siiso Paulo, ory'ene muxuttiha, ni arwaaka ephiro y'oTamasiku nihiku nle, ntoko, voophiyaka othana eriyari, wona waka. Waahikhala Waarya wuulupale waakhumale Wirimu, nto khimukhaliha ohoona, ni owo—owo aahimorela vathi. Ni owo ohimye wira aathuna osuwela aari Aani. Owo ohimye wira Nsu nimosa naahilavula, khwira, "Saulo, Saulo, munikilupatthelani?" Kookupali wira kapiitulu 8 ya Miteko.

Nto owo iirale, "T'ani Ule ommulupatth'aka?"

⁶ Vano Nsu khutthika, khwira, "Miyoka ka Yesu." Oh! "Miyoka ka Yesu, ni ti yoorika wa nyuwo okhotta ele enovahani ikuru." Vano Yesu aari exeeni nto? Yesu, Owo aari Waarya, Waarya wuulupale waaryaka vancipale.

⁷ Vano wira enilipiherye ni okhalana mulipiheryo va. Owo aari sayi Waarya, Owo ory'ene Mutthu? Vano, khaavo . . .

Naahikhala nikhuru n'antoropa ni Paulo, anamalipelela a mpaani m'olompa, yaarowa waatthukwela. Paulo aari mukhulupale. Nto awo yaarowa waatthukwela atthu ale, mwaha wa ikampaanya saya ni sikina, ni mwaha wa nrromelo wa etiini aya waakhala mwa yaawo.

⁸ Masi, vano, va aari Yesu ntoko Waarya wuulupale. Vano, vakhala wira munnuupuwela, wopaceryani, Yesu aari Waarya. Yesu aari Logos yaakhumme wa Muluku. Ni Owo aari n . . . Owo aari Nlaikha no Waataana naahoola aana a Isarayeli mothakoni. Ni Owo aari Nlumi na Mooro awo yaawehak'aya. Ni Owo aari . . . Ni okathi Owo aary'awe muumu elapo ya vathi, Owo aahihimya, "Miyoka kikhumme wa Muluku, ni kintthikela wa Muluku." Vano vakhala wira Owo aakhumme mwa Nlumi na Mooro, khukhala Mutthu, vano vakhala wira Owo otthikenle weiwe aary'awe-wo, Owo otthikenle okhala-tho Waarya. Ni Owo aari vale okathi Paulo omoonaly'awe, Owo aari Waarya.

⁹ Vano, anatoropa ale othene yaari ni Paulo khayoonale Waarya iwo. Nto vanniweryaneya mutthu mmosa wona Eyo nave akina khuhoona? Vekeekhai. Vaareera. Owo, Paulo, aahoona Eyo, masi akina aya khayoonale Waarya iwe.

¹⁰ Vano, okathi Petru aary'awe mukhatteya, ninniphwanya wira Waarya nno waahirwa mukhatteya, khuhula mikhora. Ni owo aari . . . Waarya iwe waahaakhaliha ohoona anamalipelela akina, okathi waakhum'aya, Petru arowaka. Nto vaphiyaly'awe vamukhora, owo waihunle mmansaya, vooaaleleya, khuwaleya ottuli wawe. Okhuma muhina mukhatteya, khurowa mpakha mukhora wa vate. Owo waihunle mmansaya, khuwaleya vooaaleleya. Vano nto owo khurowa munvireloni, khurowa mphironi mwa muttethe. Vano owo aahittikittha maitho awe,

ntoko ohimya wira, “Kaamuloha?” Owo khaasuwenle etthu yaakhumelenle. Masi, Nlaikha n’Apwiya, Nlaikha nenle naari Nlumi na Mooro naamweettinhe Moise mpakha ophareya khukawanya, oh, ni Ephareya Yookhwa. . . Ephareya Yooxeerya khupakeya exiri ipantte soopili, vano Isarayeli khuvira.

11 Nto vaphiyaly’aya oYordani oosarya, Owo khaisoonihenrye iwe. Masi Owo aari weiwe, okhala wira Owo aahitthukula. Vano awo yaalapunwe mweeri w’Aprili, okathi mulaponi mowaataleleya onkhal’aya moosarya maasi. Nto Owo aaheemexa ephattuwelo ya maasi, ni aaheemexa etthapwe wira ehinowele, okhala wira eyo khayuuokeleiy e tepaka; yaaheemela. Owo ti Yehova ahu. Owo ti Pwiya’ahu Yesu. Yaaheemela; ni awo yaahilapuwa mutthayani moowuuma.

12 Vano, Muluku aahihimya wira Owo aamurowa waakhapelela, tivo Owo aahaana ommaliherya Natiri Awe. Vano, Paulo, asuwelaka itthu iya, ni asuwelaka seiyo, owo aahireeriwa, okhala wira Muluku aalavula ni Paulo ene. Owo khaalavunle n’atoropa yaari ni yoowo. Owo aalavula ni Paulo paahi.

13 Vano, okathi n—Nlaikha n’Apwiya naakhuruwaly’aya, ni mukhalelo wa ettheneeri; nto anamaweha ittheneeri, asuweli a oHintiya, okathi, woonaly’aya Ettheneeri ile nto khutthara Yeeyo ikilomo imiya sene. Ni Eyo yaahivira vasulu wa khula nweheryo, okhala wira awo yaalikela okathi ni ittheneeri. Ni khaavo oonale Ettheneeri ile woohikhala asuweli. Oh, wulu! Eyo khenoothananihani? [Muthukumano oniira, “Amen.”—Mol.]

14 Vano, moone, Muluku khonvara muteko ni mitthenkeso. Owo khonvara muteko ni makhuru a atthu. Owo onvara muteko n’atthu v’omeekha. Owo oniisuupulula Mmansawe wa atthu v’omeekha. Nto vano—vano ohimya ela, kahi ila. . . Muluku onnisuwela murim’aka. Ni nkinihimya ela wa omutthu aka yoomi, wiittotopela mmansaka; vano, wira kikhale vale paahi. Masi, mwaanisuwela wira, Muluku ene yoowo, Yesu ene yoowo, ori ni hiyo voosiis’ula? Moosuwela wira, khula mmosa a nyuwo mookhalana onamoona, mwaamukhaani w’omeekha naanaano va, wira Owo ori vaava? Ni ori. . . Owo ooniirela etthu hiyo olelo Owo ohiiraly’awe mahiku makina; Owo ootthuniherya Elatarato Awe okumihiwa mahiku ala. Nookhalana Eyo ethomeiwe vaavale *vale*. Munnona? Nlumi na Mooro, Pwiya Yesu mmosaru.

15 Nwehe moota Owo onvar’awe muteko vano. Owo akhala Pwiya Yesu mmosaru, Owo onimwiira itthu imosaru, maana Bibilia ohimmye wira, “Owo mmosaru nsana, olelo, ni mahiku othene.”

16 Vano, Paulo ohinatthi ohimya etthu, khama ela yaari yoolikana wala yoovonyeya, owo aatonko orowa wEjitu khuviriha miyaakha miraru, wira asuwele vakhala wira yaari Yoolempwa wala nnari. Mwaahitoko osuwela yeeyo? Numala Paulo orukunxa murima, owo aaronwe wEjitu mwa miyaakha

miraru. Owo aahikhala iwe, ti weiwo owo aaxuttaly'awe osuwela nno wuulupale.

17 Vano, kihikhalihaka elikanyiheryo nnakhala, kinoovahani paahi moota Eroho Yowarya ekhanly'aya emosaru nlelo. Vano, ekerej'aka va ennuupuwela, miyaakha sivinre, okathi Nlaikha nla naarwaak'aya ni wooniherya itthu. Miyo kaari oowaanyiherya vakhani Yeeyo. Nyuwo othene moosuwela eyo, nyuwo a khalayi. Nyuwo mwa . . . Yaari ekeekhai, nvenxe ntata, okathi mwiiwaly'anyu. Ayo. Nkawehani, nkawehani ekereja, nlelo, ale a khalayi. Munnona? Miyo kaari oowaanyiherya, okhala wira alaleyi yaakileela wira Eyo yaari ya xetwani. Nto miyo mwa enamuna emosa kaanaamini, masi kaanilipelela. Nkaahimya etthu ya Yeeyo.

18 Masi, oh, nttotopeliwe Nsina n'Apwiya! Ohiyu umosa, iwe, Owo aahirwa, Nlaikha, khuupulula Eyo mwa Soolempwa, wira aari Yoowo. Nto okathi woonaly'aka Eyo mwa Soolempwa, vano olaleerya Eyo olumwenku wothene, Mutthaka.

19 Okhuma vaavo ookhumela Oral Roberts, A. A. Allen, Tommy Osborn, Tommy Hicks, ni akina. Munnona? Ola Mutthaka w'atthu.

20 Ni Yesu mmosaru nsana, olelo, ni mahiku othene. Eyo ti Yoolempwa, Owo mmosaru. Owo oniira etthu emosaru. Owo mmosaru. Ni Owo onvara muteko vamosaru. Owo onniisooniherya Mmansawe vamosaru. Ni Owo ori vaava, voosiis'ula, vamosaru. Vano hiyo pooti omoona; pooti ohimoona. Etthu p'itthu, hiyo nookhalana namoona naanaano va wira Owo ori vaava.

21 Vano, ninniphwanya vano wira, Paulo, ni musuwelelo yoola, ni alepaka iwarakha iya, sinci-ene saya, ory'ene mukhatteya, owo aahilikanyiha Waataana Wa Khalayi ni Wa Naanaano. Vano muupuwele, nammulepa ookiserya a Bibilia ola, ni muupuxeryo, Muluku aahikhuruwa khimuleela, "Akhala mutthu onrowa wuncererya Mmo wala okumiha etthu Mmo, yoowo onookumihiwa mpantte Muliivuruni mw'Ekumi, wa yoowo." Tivo naamukhala oohipasopa wuncererya etthu emosa Mmo. Oh, Eyo enkhalala ntoko siry'aya, ehikhaleke hat'etthu enincereriwa Mmo. Ni nihaana owanela sothene siri Mmo. Nkinthuna ekina, ni nkinthuna yoovukuwa. Kintthuna paahi ele Awo anihimy'aya.

22 Vano, Eliivuru ila y'aHeperi, etthu kithanlenly'aka Ela; etthunelo emosa, etthu emosa; ewarakh'ela, "Oophentiwa Munna Branham," ni sikina. Ni, miyo—miyo, hiyo ninthuna okhala ni Masu.

23 Vano, ekapiitulu 1, waari omunnuwiha Yesu, vano Owo t'Ule muulupalexa. Ni Paulo oonisuweliha, ohiyu ule, wira Owo aari wopaceryani wuulupale. Ni nihoona wira Owo khaari hat'etthu

woohikhala “Melikisetekhi, Mwene a oSalemi,” Muulupale a kapiitulu 7.

²⁴ Nto vano, voosiis’ula, hiyo ninnimwaattamela Owo wa mukina—moonelo mukina, wa kapiitulu 2. Vano, Paulo numala onivaha Mutthak’ola, muulupale wooreerexa, wo omunnuwiha Yesu, “Ni wawiihale Malaikha omukokhorela Yoowo.” Nto kinoona wira, va, ntoko elapo, moota ery’aya ya khalayi: “Nto Owo onrowa okhuna ntoko ekuwo, masi awo anoopweteya, masi Nyuwo munohala.”

²⁵ Ni kapiitulu 2, ahiiso, versiikulu 2, kookupali wira ti yeeyo, “Mahikuala Owo oolavula ni hiyo mwa Mwan’Awe.” Nto, nkawehani, “Khalayi ni inamuna sinci-ene Owo aahilavula ni moolumo a maprofeta.” Hiyo noovira mwa yeeyo khusuwela ele yaari maprofeta, ni moota Muluku aaruuh’awe Mutthaka Awe ni maprofeta. “Masi mahiku ala ookiserya Owo olavunle mwa Mwan’Awe, Yesu, ni Eroho Yowarya. Owo aalavula mwa maprofeta, okathi ule.” Vano noothika khusuwela wira, maprofet’ale othene yaarina Eroho ya Kristu mwa yaawo.

²⁶ Nootthikela wa Yosefe khusuwela wira owo aanimooniherya Kristu voolikana. Nootthikela wa Moise khusuwela wira owo aamooniherya Kristu. Vano nihoorwa hata mpakha wa Davidi. Nto okathi Davidi waakhoottiw’awe oYerusalemu, ahisuwelaka mwaha wa xeeni, masi aahirowa vamwaako khuweha ottuli, Vamwaako w’Olivera, khimunlela Yerusalemu okhala wira owo aahikhoottiwa. Miyaakha imiya thanu na tthaaru okhuma vaavo, Mwaana a Davidi aahikhoottiwa ntoko Mwene, oYerusalemu, khukilaathi mwaako mmosaru yoowo khunla. Oh, Eroho ya Kristu, evaraka muteko n’atthu v’omeekha!

²⁷ Vano, Paulo onipacerya, airaka:

Tivo nihaana wiiwelela oratta-ene itthu siiwaly’ahu, . . .

²⁸ Kapiitulu 2, vano, ninoopacerya.

Tivo nihaana wiiwelela oratta-ene itthu siiwaly’ahu, wira . . . ohikhale okathi onihiy’ahu.

²⁹ Oh, Muluku asuwelihe eyo oratta-ene mutapernakulu mu voosiis’ula. Kinvekela wira Eroho Yowarya ekelihe eyo saana mmurimani mwanyu. “Nihaana wiiwelela oratta-ene itthu siiwaly’ahu.” Muthinto xeeni w’atthu ontthuneya hiyo okhala, naamoonaka Yehova muulupale okhuruwa ni wira itthu Owo siniir’awe, ni woona iyo olikana, Yoolempwa ni Yoolempwa, wira iyo ti Ekeekhai? Nto hiyo imaara sikina ninookilaathi ntoko iphutukuru sa nttoro, ni oohicaliwa. Nihaana ovara muteko, okathi wothene, niphavelaka waaroiha atthu wa Kristu. Nihaana okhala maluku makumi. Nihikhaleke oonyoonyiwa ntoko sinkhal’ahu. Ninoorowa okereja, nto ninoowoona Apwiya

Yesu wira etthu, wala—wala onireeriha mwa enamuna emosa, vano nto nino—ninoothika ni wira, “Muthukumano wooreera saana.”

³⁰ Vano, olaleiwa wa Masu, hiyo onnisisivela, masi eyo kehiyo etthu yuulupalexa. Eyo kehiyo. Khinaakhanle waakokhorela Apwiya paahi vammal’ahu olaleya Masu, ntoko siniir’ahu voolimaleleya, waakokhorela Awo. Eyo ti yooreera. Masi naahaana waakokhorela Awo khula okathi w’ekumi ahu. Niry’ene omutekoni, naahaana waakokhorela. Khula okathi oniisoonihery’aya okathi, waakokhorela Apwiya mwa ohimya onamoona mwaha wa Yaawo.

Moona vale, amosa-amosa a nyuwo ahano, mwamoona muthiyana ovonnye, mwaakokhorele Apwiya mmukuxaka ni wira, “Munna, aakhala makhalelo ooreera ovikana ala.”

³¹ Nyuwo axilopwana omutekoni, mwamwiiwaka mutthu oromola Nsina n’Apwiya v’ethiru, mukhalane okathi epante aya, nto munvare ntata, mwiire, “Nyuwo, aakhala makhalelo ooreera ovikana ala. Khimwaakhanle ohimiyaka moolumo awo.” Ni omuleela ni enamuna yoomaaleleya, ni vooreera murima. Itthu iya sothene onkhala okokhorela.

Ni namoona mutthu onwereiwa, vano meetiku khunahimya wira khiivo-tho ekhanle wiiriwaka, nihaana waakokhorela Apwiya naahimeeryaka wira, “Ookhala Muluku mmosa a Wirimu onaakhala mavekelo.”

³² Vano nto noonaaka itthu iyo wiiraneya, ni woona wira sinniiraneya imaara sinci-ene, naahaana nnakhala ohihiya itthu iya ovira. Hiyo ninoohiya paahi onivira mukathani. Owo t’uri mulattu ni ekereja y’aPentekosite yuulupale olelo. Awo anoohiya ele ekhanle yuulupalexa waasonyowa mukathani mwaya, okathi waarin’aya mmatatani. Masi, nkawehani etthu yiiraly’aya, awo yiirale ntoko ikereja sikina. “Awo arookela moova-... ephiro ya Kore, khupweteya; ni ephiro ya Kayini, khupweteya moovaanyihanani mwa Kore.”

³³ Awo ahiiythokiha. Ohiya okhalana oxinna vaavo naarow’ahu owerya okhala mmosa, awo arimwiiythokiha mmansaya. Khupaka mitthenkeso mikhaani ni iyuupuwelelo sikhaani, khupacerya vaavo nto khuhonona oxinna paahi. Nto nyuwo mwaahiwehe, aPatista ni maPrespiteriyaano anoorowa waakhela, okhala wira “Muluku onniwerya ni maluku ala waapattuxa aana a Abrahamu.” Ni hiyo niro—niroohiya onisonyowa mmatatani mwaha w’okhala oohiiwanana.

³⁴ aHinti yaapweteyale sayi elapo w’akunya? Okhala wira awo yaari oohiiwanana. Awo yaapanke-ru eyeemelelo ohoolo yuulupale... Masi awo yaawana mmosa ni mukhw’awe. Awo yaamukhapelela elapo aya yaakhanle-ru othene vamosa.

³⁵ Enrowa onipweteya sayi? Okhala wira nri oohiiwanana. Moota onnipwetey'aya musuwelelo ahu ni Muluku, mwaha wo wira ninooohiiwanana. Ninookhalaha emosa, ni wiihana *ela e*—Metotista, ni *ela* Patista, ni *ela* Asempeleya, ni *ela* Unisista, ni *ela etthu ekina tho*, ni ekereja ya Muluku, ni Nasareeno, Anawetta a Osantu. Hiyo ninooovaalaniha Erutthu ya Kristu. Khivaatthuneya hiyo okhala ookawaneya nnakhala. Pooti ovirikana ankhili, masi nrowe nikhale axinna ni murima wothene. Muluku onthuna wira nikhale. Owo okhwenle Ekereja yothene ya Muluku. Ni khaninthuna okhala oohiiwanana.

Vano *nahaana wiiwelela oratta-enexa* . . . wira *ohikhale okathi onrow'ahu ohiya onisonyowa*.

Maana vakhala wira ehapari elaleiwe ni malaikha yaari yoolipiheriwa, . . .

³⁶ Munniiwa Eyo? “Vakhala wira ehapari elaleiwe ni malaikha . . .” Vano, *nlaikha* ti “namutthaka.” Nuulumo *nlaikha* nihimya “namutthaka.” Ni ninoomalaru ovira vaavo, eliivuru yoopacerya va, “Muluku khalayi ni inamuna sinciene aahaalavuliha axitiithi ni moolumo a maprofeta.” Awo yaari anamitthaka a Muluku. Ni awo yaari, vakhala wira yaari anamitthaka a Muluku, yaari malaikha a Muluku. Namitthaka nlaikhaa; ahiiso nlaikha namitthaka, kiireke.

³⁷ Namitthaka! Nyuwo mwa namitthaka, voosiis'ula. Nyuwo mwa . . . Nyuwo mwa namitthaka a ihapari sooreera wala namitthaka a ihapari soonanara. Oh, kahi yooreera, osuwela wira hiyo n'anamihupi, wira na malaikha, anamitthaka a ohihimuwa? Ni hiyo n'anamitthaka a Muluku wa olumwenku w'etampi, wira Kristu ookhala. Mmurimani mwahu, Owo ookhala. Muroohoni mwahu, Owo ookhala. Ni Owo onniruuha okhuma makhalelo a vathi oohononeya a etampi, ni oninnuwiha, ni onivaha “aleluya” mmunepani mwahu, ni onikhaliha soopattuxiwa isya. Hiyo n'anamitthaka, malaikha a Waataana. Ti yooreera!

³⁸ Nto vano, Waataana Wa Khalayi, “Vakhala—vakhala wira ehapari yaalaleiwe ni malaikha yaahilipiheriwa,” niiso eyo yaahaana okhala yoolikana. Waataana Wa Khalayi, nuulumo na profeta nihinatthi orwa wooniheriwa, naahaana owehawehiwa ni wehereriwa. Awo khiyaakhala oohicaliwa ni yeeyo, ntoko hiyo olelo.

³⁹ Okhuma paahi n'ukhalana khula enamuna ya moonelo, wala etthu ekina, “Oh, avuwihawe Muluku, ti yeeyo!” Moovonya.

Bibilia oohimya, wira, “Mahiku ookiserya, xetwani onootakiherya oKristu, volattana, mpakha onrow'aya owoototha ale Oothanliwa vaaweryaneyaka vale.” Ti yeeyo. Tivo, nihaana wehererya.

40 Nto awo yeehererya sayi mahiku aya? Ni Urimi Tumimi. Ekuwo ya vatthirima y'Aroni, yaarina maluku ale muloko ni manli vaavo: karpunkulu, yaspe, nluku tiyamente, rupi, safira. Maluku ale othene, yaathoonerya oyariwa w'axitiithi ala muloko nanli, yaari vakuwoni ya vatthirima y'Aroni. Nto okathi profeta aalaleery'awe, nto Waarya wooreerihiwa waaniphanima vasulu vaya, Muluku iira, "Eyo Ekeekhaii." Masi, hata wira yooneya ntoko y'ekeekhai moota xeeni, waahiphanime-ru vaavo, khiyaari Ekeekhai. Vano, Urimi Tumimi ule aarowa ni onamukhutto ole.

41 Masi Bibilia ola ti Urimi Tumimi a Muluku olelo. Nto profeta alaleerya, ohaana vekeekhai ophanima ni Bibilia. Nto, Muluku onoochimya, vano Owo onookhuruwa khulipiherya Yeeyo.

42 Oh, moota onwery'aka onvuwiha Muluku olelo! Kinuupuwela voosiisu mukina w'Ettiminku, ntoko yeela, okathi waakhum'aka otapernakulu. Nto nyuwo atthu mwaamunla mukivekelaka wira kihirowe. Masi, okathi, olaleiy'aka mwaha wa Davidi ni Koliyathi, ni moota onrow'anyu woonanana olumwenk'uwo, wooriyira woohicaliwa onihimya wira mahiku a miiriirya aavira.

43 Miyo khwira, "Ookhala ookorosowa mmosa muulupale, ni namala-ru omwiiva yoowo, akina aya anoophwanya ominyala." Vano Apwiya yaninivaha yeeyo. Vano nto aahikhala Oral Roberts mmosa ni Jagers, n'akina, yaahimukumiha Xoowa, nto hiyo khuwanana nwanani, khumaaliha iyano saya. Awo khanwerya ohimya wira miiriirya khasiniireya, okhala wira sinniireya. Khweeli. Masu a Muluku t'Ohimala. Awo yaahiphanima va Urimi. Yaahiphanima va Masu, awo ti Urimi Tumimi Awe. Nto okathi yaaphanim'aya Vaavo, yaari ekhweeli.

Ni wa khula mutthu omphavela etthu, mwakhala natampi, munatthuna osuwela moota munoopow'anyu, "Mmwaamini Pwiya Yesu Kristu."

44 Olelo, nihaana itthu sinci-ene murin'anyu wira. "Muhaana okhunla opacerya itthu vasya. Muhaana wira *ela* ni wira *ele*, wira moopowe."

Kinimuupuwela namatthukela muFilipi, okathi namatthukela ola aamukohaly'awe Paulo, "Kiireke exeeni wira koopowe?"

Vaakhanle wira kaari miyo wala nyuwo, nammuleela itthu *sahaatthuneya* owo wira. "Mwaahaana ohiya owurya. Mwaahaana ohiya omuttikha cuuku anyu, cuuku anyu. Mwaahaana ohiya *ela*. Mwaahaana ohiya *ele*."

Paulo khaamuhimenrye yeeyo. Owo aamuhimenrye paahi itthu *aarin'awe* wira. "Mmwaamini Pwiya Yesu Kristu, nto munimoopowa."

45 Vano, “Ole oniiwa Masu Aka ni onimwaamini Ole okirumme ookhalana Ekumi ehinimala.” Owo ti Urimi Tumimi oniphanima, Yohani Oowaarya 5:24. “Miyo k’Apwiya anvoniha iretta sanyu sothene.” Yakopo 5:14, “Nwiihane makhulupale a ekereja, yaattikitthele makhura, mavekelo anveleelihiwa ni waamini anoowoopola aretta.” Urimi aphanimaka. Munnona? Awo Masu a Muluku Ahinimala.

46 Nkincala atthu akavi oohimutthuna Muluku, apakawu, oowaanyiherya, anamahoverya ankhumelela. Muluku onookhapelela Masu Awe. Owo oohimya wira aamwiira.

47 “Ni hiyo nihaana wiiwelela saana itthu iya siiwaly’ahu, wira ohikhale okathi onihiy’ahu. Maana vakhala wira ehapari yaalaleiwe ni malaikha (maprofeta) yaahilipiheriwa...” Yaahilipiheriwa? Naamuwerya oviriha esumana mwa yeela.

48 Yaahilipiheriwa okathi Moise aalavunly’awe? [Muthukumano oniira, “Amen.”—Mol.] Vekeekhai yaahilipiheriwa.

Ankhi Eliya, okilante-ene vasulu va mwaako? Apwiya yaahimuleela, “Nvenye-vo, Eliya. Miyo kinookhala iwe ni nyuwo; kintthuna opatthana vakhani.” Muluku omusivela opatthana n’atthu Awe. Masi hiyo khaninkhala okathi woophiyerya wira Owo opatthane ni hiyo. Khaninreere waatta soovara nithweelaka, nipuro nnipuro, ni vanci-ene. “Mmaale Eliya.” Owo aatthuna miyaakha miraru ni miyeeri mithanu na mosa sa opatthana. Hiyo khaninwerya onvaha minuutu miraru, voorika. Miyaakha miraru ni miyeeri mithanu na mosa sa opatthana woohiyererya. Oh, okisivela eyo! Khwira, “Muhivela-vele ni waapeya; ninookhalana eyo yoothhokihawa-ene. Anakhuku anoorowa woolyihani. Ni sothene sinookhala saana. Miyo kintthuna opatthana paahi.” Profet’ola, Eliya, okilante-ene vale vasulu va mwaako, okathi waapatthan’awe ni Muluku, vano, mukhulupale a anakhotto khwira, “Kookupali wira kinoorowa kanvare.” Vano, muhikhalakhale mweereryaka ohonona opatthana iwo.

49 Vano, mukhulupale aahirwa, nnikhuru nawe nuulupale n’anakhotto alopwana, miloko mithanu. Nto owo khwira, “Miyo—miyo—miyo kinoorwa wookuxani, Eliya.”

50 Nto Eliya aahivenya. Phoole, va ori profeta a Apwiya! Owo khwira, “Miyo kaari murumeyi a Apwiya, okhuruwe mooro okhuma wirimu woopaheni.” Vano mooro waahimora. Mukhulupale khwira . . .

51 “Oh, moosuwela?” Mwene, kiireke, khwira, “Iwe khino waari o—overunya, etari paahi yaavira, vano khwaamorela. Kinimwaaruma akina miloko mithanu.”

52 Eliya aahivenya, mmosa wa malaikha, ehapari awe yoolipiheriwa. Owo aahaana okhala nlevelo na xariya wa

sothene saairiwe soonanara. Owo iirale, “Miyo kaari murumeyi a Apwiya, okhuruwe mooro.” Nto miloko mithanu wa nenli yaahipaheya. Vaareera. Khula nlevelo!

Maana vakhala wira ehapari yaalaleiwe ni malaikha yaahilipiheriwa, ni khula etampi ni ohiiwelela ohaakhela ehukumu eniphwanel’aya. . .

53 Vano, va t’eri etthu yuulupale, eversiikulu enttharelana.

Hiyo ninrowa otthyawa sayi, . . .

54 “Hiyo ninrowa otthyawa sayi?” Vakhala wira nsu na Eliya naahiruwa opwetexiwa, okhala wira owo aari nlaikha n’Apwiya, ninrowa otthyawa sayi Nsu na Kristu ninlavula? Wala, ninvonya sayi mwaavekeleliwaka, vakhala wira Nlo Nsu na Kristu? Vakhala wira Kristu ooruma Ekerej’Awe waavekelela aretta, ni Ekereja enniira ele Owo onihimy’awe wira Owo. . . wira awo yiireke, vano Eyo ekhanle ovonyaka sayi? Khinweryaneya. Nyuwo pooti ovonya, masi Eyo khenivonya. Ni vakhalaru wira munoosuka Nenlo, Nlo nnimooroihani ohoolo.

55 Mwavonya vale, nvonnye mmansinyu. Nyuwo munoohiya Masu. Masi vakhalaru wira munkhala ni Masu, Awo khakhanle ovonyaka. Maana masu a maprofeta yaahiira *elexe ni elexe*, kharrowa otepa Masu a Kristu okhala?

Ninrowa otthyawa sayi, naanyoonyeriwaka woopowa iwo wuulupale; weiwo opaceriwe olaleeriwa hiyo n’Apwiya, numala hiyo khulipiheriwa n’ale yiwale;

56 Nkuupuwelani Yeeyo, elaleeriwe n’Apwiya. Imaara kavi naakhanly’ahu ohokolowaka? Naarowa owerya weemela vayi, vaava va ewoora ntero? Varwiiy’awe Yesu, Owo mmosaru nsana, olelo, ni mahiku othene.

57 Vano, muupuwele, opaceriwe olaleiwa ni Yesu, Mwaneene, nto numala khulipiheriwa n’ale yaamwiiwale Yoowo. Vano mmwiiwe Yoowo.

58 Okathi Owo orwiiy’awe elapo ya vathi, Owo khaahimmye okhala mpenuxa. Owo iirale, “Nkihiyo Miyo kinvara miteko iya; t’Atithi Aka ankhala mwa Miyo. Awo t’anvara miteko. Mwaana khonwerya wira etthu Meekh’awe, masi ele oniwoon’awe Atithi evaraka,” Yohani Oowaarya 5:19.

59 Nkawehani okathi Filipe aarwiiy’awe wa Yoowo. Natanayeli. . . Numala Filipe orukunxa murima, owo aahirowa khimukuxa Natanayeli. Khwira, “Murwe, mmoone Ole omphwanyaly’ahu: Yesu a oNsareti, Mwaana a Yosefe.”

60 Nto owo khwira, “Wookhala w’okhumelel’awo etthu yooreera oNasareti?”

61 Khwira, “Murwe, moone.” Eyo t’inamuna yookupalihwiwa: mooniherye. Murwe moone. Oh, eyo ti yooreera etonko aka wiiwa. Murwe musuwele mmansinyu. Muhikhale ota

iwo muulumelaka oxerexere, masi, “Nweheke sothene, nto muthanleke sooreera.” Murwe moone.

62 Yaahirowa ettharaka ephiro, elavulaka. Okathi ophiyaly’awe Ohoolo wa Pwiya Yesu, Owo khwira, “Ola va mwIsarayeli mwa yoowo khuuvo wootha.”

63 Eyo yaahala omukumiha, esapala. Owo aahiwehaweha, khwira, “Ahe, Rabbi, mukisuwenle liini? Nyuwo khamunatoko okoona. Mukisuwenle sayi?” Filipe khwira. . .

64 “Ohinatthi, okathi wiihann’awe. . .” Khwira, “Filipe ohinatthi owiihanani, nsana, okathi waary’anyu mukhitte wa mwiri wa fiiku, Miyo kaahiwoonani.” Amen.

65 Owo khwira, “Nyuwo mwa Mwaana a Muluku. Nyuwo mwa Mwene a Isarayeli.”

66 Muthiyana mmosa aahirowa mpakha Ohoolo Wawe, nto Owo khwira, “Murowe, mwaakuxe aiy’anyu.”

Owo khwira, “Nkirina hata mmosa.”

67 Khwira, “Eyo ekeekhaii. Mwaahikhalana athanu, nto ole munkhalan’anyu vano kahiyo awinyu. Moohimya ekeekhaii.” Nkuupuwelani yeeyo.

68 Owo khwira, “Napwiya, kinoona wira Nyuwo mwa Profeta. Wira, hiyo noosuwela wira Mesiya arwa vale Owo onoonihimeerya itthu sothene.”

69 Owo khwira, “Miyo ka Yoowo, kinlavula ni nyuwo.”

70 Nto owo aahitthimaka khwaaleela atthu a mmuttettheni, “Murwe, mmoone Mulopwana mmosa Yoowo okihimenrye sothene siiraly’aka. Kahi yoola Mesiya?” Yaalavuliwe n’Apwiya.

71 Exeeni yaakhumelenle? Yesu aahihimya, Owo ohinatthi orowa wira, “Itthu Miyo sinvar’aka, nave-tho nyuwo munoovara.” Eyo ekeekhaii? [Muthukumano oniira, “Amen.”—Mol.] “Itthu Miyo sinvar’aka nave-tho nyuwo munoovara, hata soovikana iya, maana Miyo kinrowa w’Atithi.” Oh, kinniwerya owoona okathi waarow’aya, mapuro othene. Marku 16, “Yaahirowasa mapuro othene, elalelyaka; Apwiya yaanaakhaliherya, elipiheryaka Masu.”

Nto va, Paulo, avahaka etthu emosaru. Owo ohimmye wira e—Ehapari yooreera yaapacenrye olaleiwa ni Yesu, ni yoolipiheriwa wa hiyo n’ale yaamwiiwale Yoowo. Nlo ti Nluku Noothipeliwa. Oh, nttotopeliwe Nsina n’Apwiya! Nlo ti Nluku Noothipeliwa.

72 Ni wuupuwela, miyaakha ikonto piili soovira. Aakhumelela atthu oohimutthuna Muluku, oohaamini, ni oohoverya, ni oohimwaamini Muluku. Masi, olelo, Yesu yoowo mmosaru onnilipiherya Masu Awe enamuna emosaru n’ale animwiiwa Yoowo. “Mmwiiwe Yoowo,” khenihimya paahi wiiwa elaleeriwo. Eyo enihimya, omwiiwa *Yoowo*. Ayo.

⁷³ Ninrowa otthyawa sayi? Otthyawa wahu ori vayi? Oh, nyuwo muniira, “Attottopeliwe Muluku, kiniira mpannta wa ekereja Metotista. Miyo ka muPrespiteriyaano. Miyo ka muPentekosite.” Eyo kherina naata ni Yeeyo. Nto nyuwo munookela oxerexere ni munththuna wiihana Eyo “olapela minepa, wala etelepatiya ya miyupuwelo, wala xetwani,” wala etthu. Wuuliha muru!

⁷⁴ “Vakhala wira khula ehapari yaahilipiheriwa ni malaikha . . .” Yesu oohimya, “Kehiyo . . . Okathi vakhani, olumwenku khunrowa okoona-tho. Nave, nyuwo munookoona, maana Miyo kinookhala ni nyuwo, hata mwa nyuwo, mpakha omala okathi.” Nto hiyo naamoonaka Owo okhuruwa, wira atthikele olipiherya Masu Awe, ninrowa otthyawa sayi naihiyaka wiisoototha ni ekereja khata, wala mutthenkeso khata, wala muromolelo, wala eyuupuwelelo ahu yaamukhaani yoohikhal’etthu? Vanreerela mutaphuwe. “Maana khula etampi yaahaakhela ehukhumu aya vathi va malaikha, khivatepanxe okathi Mwaana a Muluku onlavul’awe okhuma Wirimu, wira ooniherye Masu Awe! Ninrowa otthyawa sayi, naanyonyeriwa woopowa wuulupale?” Oh, wulu! “Muluku nave . . .”

Versiikulu 4:

Muluku nave onnikhalela onamoona, . . .

⁷⁵ Nkawehani ila. Apwiya yaahikhalela onamoona. Oh, nkireere otthapa mwaha wa yeeyo! Apwiya yaahikhalela onamoona.

⁷⁶ Nkawehani. Okathi Eliya aakilanth’awe vamwaako, nto owo khwira, “Kaari mutthu a Muluku, mooro okhuruwe Wirimu woopaheni.” Muluku aahikhalela onamoona wira owo *aari* mutthu a Muluku.

Muluku kweekwe onnikhalela onamoona. Makhalelo anyu anookhalela onamoona. Nkisuwenle ole okhanle onamoon’anyu, masi makhalelo anyu annilavula vanci-pale, nsu nanyu nihikhanly’aya wiiweyaka. Masi, ma—makhalelo anyu, makhalelo anyu a khula nihiku anookhalela onamoona ele mukhanly’anyu. Muluku onnikhalela onamoona. Ayo. Eroho Yowarya ekanyeryo, nto ekanyeryo enkuxa ipantte soopiili sa epaphelo. Awo anniwoonani mweemenle-ene *va* ni anniwoonani mwaarowaka. Kahi mukereja paahi masi muteko wa khula nihiku. Nyuwo munthhitiwa ekanyeryo ipantte soopiili, muhina ni ota. Ni ohakalala munkhalan’anyu, ni makhalelo muneettel’anyu, munootthitiwa, muhina ni ota, munsuwel’anyu wira muhoopowa ni olumwenku onsuwel’aya wira muhoopowa, mwaha wa makhalelo muneettel’anyu, maana Muluku onnikhalela onamoona. Nttottopeliwe Nsina Nawe Noowaarya! Wulu, kinnoona okhala natiini!

⁷⁷ Muupuwele, axinna, vo. Oh! “Ipwittipwitthi Saka sinniwa Nsu Naka, vano mmalapo iyo khasimmutthara.” Oh, moota masin’ahu ary’aya mmatatani mw’Awe! Ari ohoolo Wawe,

othana n'uhiyu. Masu Awe ari ohoolo Wawe okathi wothene, Natiri Awe. Owo khokhanle oliyalaka. Ni Owo onnoophentani.

⁷⁸ Vano, Owo onimwaakhalela onamoona ale Awawe. Nyuwo khamunthukula eyano anyu n'uhimya nuulumo, olumwenku onoosuwela wira ehookhumelelani etthu.

...okhalela onamoona, soopiili ni ithoonyeryo ni sootikiniha, ni miiriirya sinci-ene, ni soovaha sa Eroho Yowarya, ntoko sintthun'awe?

⁷⁹ Nrowe nikuxe Yoolempwa emosa paahi vano nihinatthi omaliha; Nihiku na Pentekosite, okathi waakhenly'aya Eroho Yowarya. Mahiku oophiyaka maxexe ohoolo waya, Petru aahivira vamukhora onihaniwa Wooreera; owo ni Yohani. Awo khumwiirela, "Muniwehe hiyo," mulopwana mmosa. Nto owo khwira, "Nkirina eweero nnakhala eparatha, masi ele erin'aka kinimoovahani. Mwa Nsina na Yesu Kristu a oNasareti, nvenye mweetteke." Vano mulopwan'owo aahiweha osulu ni khaakohale etthu ya yeeyo. Owo aarovenya paahi khurowa eettaka. Awo yaari atthu oohisuwel'etthu ni oohisoma. Masi Bibilia ohimmye wira, "Awo yaahaana owiwelela, maana yaanisuwela wira yaaheetta ni Yesu."

⁸⁰ Munna, okathi olumwenku onsuwel'aya wira mwaahikhala ni Yesu, mwaaweryaka otthara makhalelo oohihononeya mwa olumwenk'ula wa vano mw'epiphini mu, olumwenku onsuwel'aya ni onwery'aya woona wira mwaahikhala ni Yesu; okathi namuttompe mmosa, oonanarasa oohifayi a mphironi onwery'awe okhala muhano, oorapihiwa mPhomeni mwa Mwaapwittipwitthi; Muluku onnikhalela onamoona wira Owo mukumii.

⁸¹ Mmukuxe namuhapaliwa, okhanle ootakhalex aarow'awe ohiromeleya n'amwar'awe, ni aarowa waahaaxa an'awe, ni okuxa yoolya vameesa, wira ahononeke ni namuttompe. Mmuhiye akumane ni Yesu emaara emosa. Munoomoona owo ohokolowa, ntoko Muttitthi, aari n'ankhili nto khuwara ikuwo, w'ana awe ni amwaar'awe ni ale oophentiw'awe. Vekeekhai.

⁸² Okathi uwo ovinre, ntoko miyaakha miloko mixexe sivinre, okathi itiini sa molumwenkuni saathukumanny'aya, ni atthu oohiyana-hiyana yaavenyaly'aya khulavula. Vano Mmaka khulavula mwaha wa etiini y'Emaka. Ayaini khulavula mwaha w'Ayaini; muBuda mwaha wa Buda. Nto okathi tothoro mmosa, kinooliyala nle naari nsina nawe nookiserya, okathi ula. Kaanisuwela nsina nawe, masi kirootiyala. Owo aahilavula wira athoonyerye oKristu. Vano owo aahithariha ehantisi ya Muhano Makabewu a Oklahoma, wAmerika.

Owo aari oopahuwa ni oohifayi saana, mpakha okathi awo waaronw'aya omwiiva, awo khiyaatthuna ompweherya matat'aya, owo aari oohifayi ni ootakhala. Awo yaahimutthukwa emuhimyanaka: onvura sikaro; weettiha ekaaruwaxe yuulupale;

ni ohonona ma—ma—malamulo, oxaahiti Oklahoma, okathi waaviny'awe mphironi, eettihaka ikhavalalo xexe. Ni owo aari ootakhalexa ni oohifayi mpakha atthu yahaattamel'aya nipuro waary'awe; vanci-enexa, mpakha okathi alipa-oowiiva yaarow'aya omwiiva, khiyaatthuna omuhopha. Awo yaamuyeehenrye pirinisi paahi ni mapururu, wira emwiive.

Nto okathi mulaleyi ula mwaamukhaani aatharihaly'awe ehantisi awe, mwa enamuna emosa, mpakha waawiirihaly'awe atthu okilaathi oxerere wa ikhukulu saya, ewiriyana ele yaarowa okhala yootharelana. Vaphiyenry'awe yeeyo: ootakhala saana, oottakatta, oohifayi, mpakha alipa a malamulo yahaatthun'aya hat'etthu ni yoowo, owo aari oohifayi. Xetwani ene a omooroni khino, aammukhootta mutthu uwo, enamuna aatharihaly'awe ehantisi iyo. Vano owo khwira, "Alopwana a itiini sa molumwenkuni, etiini anyu yookhalana etthu yaarowa opuputtha matata a Muhano Makabewu?"

⁸³ Atthu othene khukhala oomaala. Vano owo khumana ikuphi, khutuphela osulu. Owo khwira, "Avuwihawe Muluku! Ephome ya Yesu Kristu khenrowa opuputtha matat'awe paahi, masi Eyo enoorowa opuputtha murim'awe ni omukhaliha Mwaakameliwa Awe." Kinimooleelani:

Mahala oowunnuwexa! a Apwiya,
Amoopenle namutakhaliwa!
Miyo kaahirimeela, masi vano koophwanywa,
Kaari oohoona, masi vano kinnoona.

Mahala t'axuttihale murim'aka woova,
Mahala t'akumihale woova;
Moota akhanly'aya mahala ooreerexa
Okathi kaaminni aka!

⁸⁴ Vekeekhai. "Ninrowa otthyawa sayi, naanyoonyeriwaka yeeyo?" Mwanyoonyeriwa olya, munimookhwa. Mwanyoonyeriwa orukunuwa nlootho, munoophwanya ehasara. Mwanyoonyeriwa owama eleethi enyompe, eyo enimuuma. Mwanyoonyeriwa maino anyu, anookhuliwa othene. Vekeekhai. Munooliva mwaha wo onyoonyiwa wanyu.

⁸⁵ O Branham Tabernacle ni nyuwo aletto, mukihaye kooleleni etthu vano. Mwanyoonyeriwa okhalela onamoona ovuwa wa Muluku, mwanyoonyeriwa onvaha Muluku nttottopelo ni ovuwa, munoophwanyaneya mury'ene ooriirya, ookhaleleya, ni ootthikela ottuli, nihiku nlo. Mmuttotopele Muluku. "Ninrowa otthyawa sayi, naanyoonyeriwaka woopowa wuulupale?"

⁸⁶ Vanimooxa. Kinoomalaru woona wira Munna Thom, ovolonwe ottuli iwe. Ninoomaliha ni ninootthikela ela olelo ohiyu, Apwiya yatthuna vale.

Nrowe nivekele okathi vakhani.

⁸⁷ Tith'ihu a Wirimu, wa Nyuwo sikhale iparakha sothene, ni mittottopelo, ni nttittimiho, ni ovuwa ni ankhili, ni ikuru, ni owerya, voohimala. Oh, Mwapwittipwitthi ule okilanthé Veehiceni, owerya ni omwene ni itthu sothene siheliwe mmatatani mw'Awe. Okathi Owo ohihimuwal'y'awe mwalipa-ookhwa, wira nikhalihiwe anaxariya, Owo aahikhuwelela olumwenku, "Koovahiwa owerya wothene Wirimu ni vathi mmatatani mw'Aka. Vano, murowe, mulaponi mothene mwalaleye Ehapari yooreera."

Mwaapwittipwitthi oophenteya, Ephome
 Anyu yooreera
 Khenimala owerya Waya,
 Mpakha Ekereja yothene yoovuluxiwa ya
 Muluku
 Woopoliwa, wira ehittheke tho.

⁸⁸ Munikhaliherye, ntoko arumeyi, woonaka wira ninniphavela vanci-ene; moota orin'ahu okhalana ekereja, nihaana okhalana *ela*, nihaana okhalana sothene.

⁸⁹ Axaar'ihu, ehinatthi orowa okereja, enamwi yiisiihanaka aKristu, ahaana okhalana muthinto mmosa wa evestiitu, wala ahaana owara oratta-enexa.


Ni alaleyi ahaana okhalana musurukhu munci-ene ehinatthi orwa, ni sothene sihaana okhala *elexe ni elexe*.

⁹⁰ O Kristu, kaasomaka va, "Moota awo yeettas'aya, ewaransene isapala sa ipwittipwitthi ni isapala sa ipuri, yaakhala mulittini mw'elapo, ni mmittuphani." Awo yaaheettasa, elupatthiwaka vootakhala, ni, nnakhala vo, yaahikhalana Waamini, vathi va elaleeryo ya malaikha. Hiyo ninrowa otthyawa sayi, Pwiya Yesu onivanhe-ene ithhoko sooreera, ni ikaaro, ni ikuwo, ni yoolya? Nto hiyo nnimwaapa. Ninookilaathi. Ninooviliwa. Khaniniilipiha okhuma ni wira etthu ya yeeyo. Ninrowa otthyawa sayi, Muluku?

⁹¹ Oh, kinvekela wira nvihihe ekupalelo ya khalayi mwa khula murima, voosiis'ula, Pwiya, wira atthu ekhale oovenya ni ookhomaala. Nivare muteko okokola wa nihiku waaryaka, okhala wira nsuwa nnootupweela voowaakuva. Ni ekhalelo y'atthu enoomala, nto khonrowa okhala-tho okathi. Onrowa otakanxana ni Ohimala.

⁹² O Muluku, munivahe olelo wira nirowe ni moonelo musya, ni ankhili, ni osuwela saana, wira nisuwele moota wo owaattamela anatampi ni waaruwa wa Kristu. Mwiiwe mavekelo a murumeyi Anyu, Pwiya.

⁹³ Kinvekela wira, akhala mutthu va, ohimmusuwela Kristu ntoko Moopoli awe, munnitthuna ovenxa ntata ni wira, "Mukuupuwele, Munna Branham"? Munnitthuna ovenxa ntata paahi, wira, "Mukuupuwele. Kintthuna kikhale muKristu.

Nkintthuna-tho onyoonyiwa”? Muluku ooreeriheni, ottuli iwo, mulopwana. Mutthu mukina tho? Oniira, “Kintthuna kivenxe ntata, Munna Branham. Ni kintthuna kimukupali Kristu, ntoko Moopoli aka, koonyoonyeriwa, okathi wothene. Oh, kinnirowa okereja, ekeekhai, kinniira mpantta wa ekereja.” 

AHEPERI, EKAPITULU YA NENLI 1 EMK57-0825M
(Hebrews, Chapter Two 1)

ITTHARANELO YA ELIVURU YA AHEPERI

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku voosiisu, mahiku yeeteka 25 mweeri w'Agosto, 1957, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org